


Vischnaunca da Medel(Lucmagn)



**Ordinaziun per la promoziun da cultura dalla
vischnaunca da Medel(Lucmagn)**

1. Intent

¹ La vischnaunca vul promover che l'ierta culturala dalla Val Medel vegn perscrutada, tgirada e mantenida. Ell'intenda da salvar la multifaradad culturala dallas uniuns, organisaziuns ni persunas privatas che tgiran, perscruteschan ni intermediieschan la cultura.

² Il lungatg romontsch, en special il dialect medelin, fa part dall'ierta culturala e duei vegnir promovius en special.

2. Definiziun da cultura

En rama dalla promoziun da cultura sa la vischnaunca da Medel sustener: il lungatg romontsch, il dialect medelin, il mistregn local, la cuntrada cultivada, art, musica, teater, litteratura, architectura, historia, usits ed uniuns en general.

3. Principi dalla promoziun da cultura

¹ La vischnaunca sa sustener instituziuns, uniuns e privats ch'intentan da promover la lavur culturala cun contribuziuns singulas.

² Ella sa conceder contribuziuns annualas ad instituziuns culturalas elegidas e quei en rama dil preventiv concediu.

³ La vischnaunca sa sustener projects culturals d'impurtonza communal e da fetg grond interess regional cun ina contribuziun unica.

⁴ La vischnaunca sa undrar prestaziuns culturalas extraordinarias e merets en fatgs culturals ed en favur dall'ierta culturala medelina ni da fetg gronda muntada regionala.

⁵ La vischnaunca sa sezza crear instituziuns culturalas e/ni surdar il tgamun a tiarzas persunas ni instituziuns.

⁶ Ella sustegn la filosofia da collaborar culturalmein ella regiun.

⁷ Instituziuns ch'ein orientadas a gudogn e rendita survegnan per regla buca ina contribuziun.

⁸ La promoziun dalla cultura ei per la vischnaunca subsidiara. Vul dir ch'ella surpren mo pensums ed incaricas che las uniuns, organisaziuns, privats ed instituziuns san ni han buca interess da sorprendere.

⁹ La collaboraziun sa vegnir francada cun cunvegnas da prestaziun e cundiziuns.

¹⁰ Las uniuns ein ina gronda petga dalla cultura ella Val Medel. La vischnaunca intenta da promover ellas cun bunas cundiziuns da rama.

4. Budget

La radunanza communal conceda ils mieds finansials per la promoziun dalla cultura ella rama dil preventiv.

5. Pretensiun legitima

Ei exista buca in dretg da survegnir contribuziuns.

6. Procedura e contribuziuns

¹ Per contribuziuns da promoziun da cultura annualas eis ei d'inoltrar alla suprastanza mintg'onn, entochen la fin settember, ina damonda. Per occurrenzas unicas, projects ed autras activitads culturalas ei la damonda da contribuziun d'inoltrar avon ch'ina occurrenza ha liug ni avon l'entschatta d'in project. Occurrenzas gia vargadas survegnan per regla buca contribuziuns.

² La damonda da contribuziun cuntegn:

- a) las finamiras
- b) la finanziaziun previda dil project

³ La vischnaunca sa definir certas cundiziuns per las contribuziuns.

⁴ La vischnaunca sa pretender ch'il petent detti plaid e fatg co el drova efficientamein ils mieds.

⁵ Vegnan cundiziuns buca respectadas sa la suprastanza snegar la contribuziun. Ein talas gia concedidas sa ella pretender da restituir dil tuttafatg ni parzialmein talas.

⁶ Ils daners ston vegnir impundi pigl intent dumandau.

⁷ Il petent dil project procura che la vischnaunca vegn menziunada ella publicitad.

7. Criteris da promoziun

La suprastanza giudichescha las damondas arisguard:

- a) la tematica dil project cultural
- b) la qualitat dil project ni dils merets extraordinaris
- c) l'impurtonza dil project per la vischnaunca ni per la regiun
- d) la relaziun dil project ni dalla persuna ni l'instituziun culla Val Medel
- e) la relaziun cull'ierta culturala ni cul lungatg medelin
- f) la relevanza dil project
- g) la pusseivladad finansiala dil petent
- h) l'atgna lavur dil petent
- i) buca orientaziun a gudogn e rendita

8. Cundiziuns da rama

La suprastanza ei cunscienta dall'impurtonza dallas uniuns ed occurrenzas culturalas en vischnaunca, il socialessar ed ils survetschs che vegnan organisai. Ord quels motivs procura ella per bunas cundiziuns da rama:

- a) Il diever dallas localitads publicas inclusivamein l'infrastructura ei gratuita.
- b) La suprastanza sa sustener ni intermediar agid en projects da muntada communal.

9. Contribuziun da sustegn

¹ La contribuziun annuala per projects munta a fr. 250.— tochen fr. 500.—

² Il sustegn annual per survetschs specials d'uniuns munta a maximal fr. 2'000.—

³ La contribuziun per singuls projects culturals da muntada per la Val Medel ni contuorn muntan a fr. 500.— tochen fr. 3'000.—

⁴ La contribuziun per projects cun gronda muntada communal ni regionala munta a maximal fr. 5'000.—

10. Disposiziun finala

Quei muossavia entra en vigur suenter l'approbaziun entras la suprastanza communal.

Il muossavia ei vegnius approbaus a caschun dalla seduta dalla suprastanza communal diils 21 d'avrel 2020.

Il president communal:

Il canzlist communal:

Rico Tuor

Valentin Pally